

Minister Otmar Oduber:


Como 27 compania a registra den destaho publico pa bin cu incinerator

ORANJESTAD (AAN): Na December a tuma luga un destaho publico (RFP) pa companianan registra nan mes pa forma parti di e proceso pa bin cu un incinerator pa mihor maneho di sushi na Aruba. Un total di 27 compania a inscribi nan mes pa participa den e destaho publico aki. E proceso mester sosode conforme e metodo di 'Build, Own and Operate' manera cu a dicidi hunto cu Consejo di ministranan y Parlamento, Minister di Desaroyo Teritorial, Infraestructura y Medio Ambiente Otmar Oduber ta splica.

Companianan cu a participa ta di tur parti di mundo manera China, Dinamarca, Latino America, Europa, Merca, Caribe y tambe tin companianan local cu a partner cu companianan

internacional. Entre e registracionnan tin nomber di companianan renombra mundialmente, cu ta muestra cu claramente tin atencion y interes pa Aruba. Esaki despues cu a hiba e proceso di Request For Information (RFI) unda cu tambe a haya riba 20 compania cu a muestra interes.

E 27 companianan aki lo mester presenta un oferta oficial pa 14 di April. Minister Oduber a informa cu otro siman ta cuminsa cu e proceso cu ta yama 'walk through' caminda cu tur e companianan aki por ta presente pa haci pregunta cu ainda por ta habri den cuadro di e destaho publico aki. Despues ta sigui un di dos periodo di pregunta pa cualkier pregunta adicional cu e companianan kier haci.



Pa dia 14 di April 2019 e ofertanan definitivo mester ta aden di cada un di e companianan aki cu a inscribi nan mes pa den e periodo cu ta sigui di 2 pa 3 luna, e evaluacion tuma luga di tur e ofertanan cu a drenta. Finalmente lo scoge un compania cu lo bay negocia cu ne, riba e diferente contractnan cu mester cera. Pa

despues presenta cu esaki na Parlamento pa nan duna e 'bendicion' final pa por cera un contract y cuminsa cu e proceso di construccion di e planta aki cu den futuro (1 año y mey) lo ta den operacion, cu tecnologia y forma responsabel pa maneha cu sushi na Aruba.